

# Korte Weg a revolucion a manera pa proyecta arte y cultura

**ORANJESTAD-** Un team di persona a bini hunto despues di varios año involvi den arte y cultura. Capturando Aruba su beyesa y herencia via un lens di un camara y despues proyecta esaki den arte ta e manera exitoso cu Cado De lannoy di e grupo Korte Weg ta trece dilanti. De Lannoy, fotografo cu ta gusta saca potret di Aruba su tesoronan scondi. E ta explora monumentonan bandona y sitionan scondi- cu su lens e ta capta e colornan y historia di e edificacion cu awor ta lubida.

Ash Alip, otro miembro di e exitoso team aki ta cose tasnan na man, formula cu e la haya for su grandinan y tradicion cu el a scoge di persigui y sigui trece pa Aruba y mundo den su totalidad. E ta e persona responsabel pa diseña tur e instalacionnan. Frank Kelly ta agricultor y ta planta y cultiva flornan

pa come cu na su turno e ta uza den diferente cocktail cu e ta traha semper teniendo e nomber y cultura di Aruba den su mente Un cocktail



traha cu sucu di panela, awa di lamunchi, rom, un tiki Madame Jeanette y despues presenta y acaba pa flornan di watapana, ta un delicia. Mario Briezen ta e carpinte y esun cu hinca e formula di ideanan den otro.

Korte Weg a inicia como un idea pa trece bida bek den Caya Grandi y tambe pa

pone mas enfasis riba arte. Aruba ta conoci pa tin masha hopi hanchi cu ta yena di bunita paisahe di edificionan di antes pero tambe cu ta

contene e misterio di antes combina cu e actual. Y ta aki a scoge un di nan, net dilanti di e monumental edificio di Aruba Bank den Caya Betico Croes.

E turista tabata den necesidad di yega na un luga asina y haya productonan local traha dor di nos hendenan y tambe sinti e experiencia di un rato cu e Arubiano y su herencia

y cultura. Invitando varios artista pa participa den esaki, di loke a inicia cu tres artista awendia a crece y bira algo presentabel y agradabel.

Unoca, a visualisa e mision di e grupo a converti su mes rapidamente den nan patrocinado. Y na su turno e grupo y nan trabao a haya e sosten necesario di Aruba Tourism Authority. Artistanan tambe a haya e iniciativa masha bon mes y ta sigui crece segun tempo ta sigui pasa. Esunnan cu ta haci obra di man, artesanian, souvenir di Aruba, obranan di glas, driftwood, palet, cuero y joyas tur ta wordo haya den Korte Weg. Di un forma responsabel y artistico e grupo ta crea pa tur artesano un pop up shop specialmente designa pa nan obranan. Y lo mas esencial y cu ta garantis e exito di e proyecto ta cu nunca e pop up shop ta mescos, pero e ta sigui cambia y innova.

Korte Weg ta e manera ideal

pa e artesanonan crea un network na Aruba y haya mas experiencia y crece den arte den exterior. Den futuro e idea ta pa trece e instalacionnan mas grandi y inspira pa e Festival Burning Man. Instalacionnan cu ta a base di 75% di materialnan recicla y asina traha un comunidad rond di dje.

Recientemente e fotografo local, Cado De Lannoy a presenta su prome exhibicion internacional. Esaki a tuma luga na e pop up gallery shop, Basement WRX na Montclair New Jersey. E coleccion ta basa riba su inspiracion di Aruba, den un perspectiva diferente.

E cuater personanan ta orguyoso di e sosten cu nan ta haya for di e comunidad di Aruba, for di Aruba Tourism Authority, Unoca, Ministerio di Cultura y for di nan mesun companeronan den arte. Prestige Awards ta orguyoso di por ta honra e artistanan aki cu e premio pa innovacion den arte y cultura. □